



Republika e Kosovës
Republika Kosovo - Republic of Kosovo
Kuvendi - Skupština - Assembly

Legjislatura IV
Sesioni pranveror

Mbledhja plenare e Kuvendit
P- 112
Prishtinë, më 11 dhe 18 prill 2013

PROCESVERBAL

**I MBLEDHJES PLENARE TË KUVENDIT TË REPUBLIKËS SË KOSOVËS,
E MBAJTUR MË 11 DHE 18 PRILL 2013**

Mbledhjen e kryesoi kryetari Jakup Krasniqi, ndërsa i ndihmuan nënkryetarët Xhavit Haliti dhe Petar Miletqi.

Kryetari i deklaroi të hapura punimet e mbledhjes plenare dhe procedoi me rendin e ditës, të përgatitur nga Kryesia e Kuvendit, në marrëveshje me kryetarët e grupeve parlamentare.

1. Koha për deklarime jashtë rendit të ditës

Deklarime jashtë rendit të ditës paraqitën deputetët: Sala Berisha-Shala, Sabri Hamiti, Visar Ymeri, Aurora Bakalli, Bekim Haxhiu, Albulena Haxhiu, Nait Hasani dhe Halit Krasniqi, diskutimet e të cilave janë dhënë të plota në transkript.

2. Koha për pyetje parlamentare

Deputetja Lirije Kajtazi parashtrroi pyetje për ministrin Nenad Rashiq në lidhje me progresin në çështjen e pagesës së kontributeve pensionale nga shteti zviceran dhe sa ka përparime nga Qeveria e Kosovës në marrëveshjen për sigurime ndërmjet Kosovës dhe Zvicrës. Ministri Nenad Rashiq iu përgjigj pyetjes së deputetes Lirije Kajtazi.

Deputetja Alma Lama parashtrroi pyetje për kryeministrin Hashim Thaçi në lidhje me atë se pse kryeministri nuk e ka zhvilluar asnjë vizitë zyrtare me krerët shtetëror në Gjermani, në mënyrë

që të avancojë bashkëpunimin dhe koordinimin në fushën e diplomacisë, por edhe në fushat tjera, siç janë ekonomia, arsimi etj.

Kryeministri Hashim Thaçi nuk ishte i pranishëm në sallë.

Deputetja Justina Shiroka-Pula parashtrroi pyetje për ministrin Dardan Gashi në lidhje me moszbatimin e udhëzimit administrativ nr. 02/2009 për administrimin e automjeteve të hedhura, si dhe vendimi i Qeverisë për mënjanimin e këtyre mbeturinave.

Ministri Dardan Gashi nuk ishte i pranishëm në sallë.

Deputetja Justina Shiroka-Pula parashtrroi pyetje për ministrin Dardan Gashi në lidhje me atë se çka është duke ndërmarrë ministria për vetëdijesimin e qytetarëve për mosshkatërrimin e shtretërve dhe lumenjve të Kosovës dhe sa janë duke u realizuar projektet për rehabilitimin e lumenjve.

Ministri Dardan Gashi nuk ishte i pranishëm në sallë.

Në vazhdim, Kuvendi i zhvilloi punimet me këtë:

Rend dite

3. Miratimi i procesverbalit të seancës së mëparshme,

4. Shqyrtimi i dytë i Projektligjit për turizmin,

5. Shqyrtimi i dytë i Projektligjit për ndryshimin dhe plotësimin e Ligjit për inspektoratin dhe mbikëqyrjen e tregut,

6. Debat parlamentar lidhur me statusin e pazgjidhur të punëtorëve të arsimit shqiptar të Republikës së Kosovës nga viti 1990 deri në vitin shkollor 1999, sipas kërkesës së Grupit Parlamentar të LDK-së dhe rekomandimeve të komisioneve parlamentare.

3. Miratimi i procesverbaleve të mbledhjeve plenare të mbajtura më 28, 29 mars dhe më 4 prill 2013

Deputetja **Teuta Sahatqija** pati vërejtje në procesverbalin e mbledhjes plenare të datës 28 mars 2013, përkatësisht në vendimin për Komisionit Hetimor Parlamentar. Ajo shtoi se në këtë vendim është pasqyruar vetën pjesa - diapozitivi i kërkesës së GP të LDK-së, por nuk është paraqitur edhe pjesa nga arsyetimi i kërkesës.

Lidhur me këtë çështje diskutuan edhe këta deputetë: **Ismet Beqiri, Fadil Demaku, Visar Ymeri, Suzan Novobërdaliu, Muhamet Mustafa, Ramiz Lladrovci dhe Sabri Hamiti**, diskutimi i plotë i të cilëve është dhënë në transkript.

Kryetari sqaroi se vendimi për formimin e Komisionit Hetimor Parlamentar është i plotë dhe është hartuar mbi bazën e diapozitivit të kërkesës së GP të LDK-së. Vendimi i përmban të gjitha elementet e kërkesës dhe pika 3 e tij përfshin: “Komisioni Hetimor Parlamentar në pajtim me Ligjin për hetim parlamentar duhet ta hetojë çështjen e ngritur dhe Kuvendit t’ia paraqesë raportin përfundimtar në afat prej 2 muajve nga dita e themelimit”. Pra, ky vendim nuk ka dykuptimësi dhe i ka përfshirë të gjitha element nga kërkesa e parashtruar. Komisioni le të punojë në bazë të autorizimit me këtë vendim dhe mbi bazën e Ligjit për hetim parlamentar.

Me këto sqarime, Kuvendi i miratoi procesverbalet e mbledhjeve plenare të mbajtura më 28, 29 mars dhe më 4 prill 2013.

4. Shqyrtimi i dytë i Projektligjit për turizmin

Kryetari i njoftoi deputetët për raportet dhe rekomandimet e komisioneve të përhershme dhe të Komisionit Funksional raportues për Projektligjin për turizmin.

Kryetari i hodhi në votim veç e veç amendamentet e propozuara në këtë projektligj.

Kuvendi i miratoi amendamentet nr: 1, 2, 3, 4, 5, 6, 7, 8, 9, 10, 11, 12, 13, 14, 15, 16, 17, 18, 19, 20, 21, 22, 23, 24 dhe 25.

Pastaj, kryetari e hodhi në votim Projektligjin me amendamentet e miratuara, në tërësi.

Rezultati i votimit ishte, si vijon:

Për ----- 59,
Kundër ----- 7,
Abstenime ----- 0.

Kryetari konstatoi se Kuvendi e miratoi Ligjin për turizmin.

5. Shqyrtimi i dytë i Projektligjit për ndryshimin dhe plotësimin e Ligjit për inspektoratin dhe mbikëqyrjen e tregut

Kryetari i njoftoi deputetët për raportet dhe rekomandimet e komisioneve të përhershme dhe të Komisionit Funksional raportues për Projektligjin për ndryshimin dhe plotësimin e Ligjit për inspektoratin dhe mbikëqyrjen e tregut.

Kryetari i hodhi në votim veç e veç amendamentet e propozuara në këtë projektligj.

Kuvendi i miratoi amendamentet nr: 1, 2, 3, 4, 5, 6, 7, 8, 9, 10, 11 dhe 12.

Pastaj, kryetari e hodhi në votim Projektligjin me amendamentet e miratuara, në tërësi.

Rezultati i votimit ishte, si vijon:

Për ----- 68,
Kundër ----- 0,
Abstenime ----- 0.

Kryetari konstatoi se Kuvendi e miratoi Ligjin për ndryshimin dhe plotësimin e Ligjit për inspektoratin dhe mbikëqyrjen e tregut.

6. Debat parlamentar lidhur me statusin e pazgjidhur të punëtorëve të arsimit shqiptar të Republikës së Kosovës nga viti 1990 deri në vitin shkollor 1999, sipas kërkesës së Grupit Parlamentar të LDK-së dhe rekomandimeve të komisioneve parlamentare

Kryetari i njoftoi deputetët se Grupi Parlamentar i LDK-së, në bazë të nenit 15.8 të Rregullores së Kuvendit, ka kërkuar debat parlamentar lidhur me statusin e pazgjidhur të punëtorëve të arsimit shqiptarë të Republikës së Kosovës nga viti 1990 deri në vitin shkollor 1999.

Gjithashtu, edhe Komisioni për Arsim dhe Komisioni për të Drejtat e Njeriut, që ishin ngarkuar nga Kryesia e Kuvendit për ta shqyrtuar kërkesën e mësimdhënësve lidhur me statusin e tyre të pazgjidhur për periudhën 1990-1999, ia kanë paraqitur rekomandimet Kuvendit për miratim.

Pasi kërkesa e GP të LDK-së dhe rekomandimet e dy komisioneve parlamentare kanë të bëjnë me të njëjtën materie, janë përfshirë në një pikë të përbashkët.

Kryetari e ftoi përfaqësuesen e Grupit Parlamentar të LDK-së, që në cilësinë e propozuesit të çështjes, ta marrë fjalën.

Ismet Beqiri, në cilësinë e propozuesit të çështjes, tha se kanë kërkuar debat parlamentar për arsimin shqip të viteve '90, debat për punën e madhe, kolosale, të armatës së tërë të arsimtarëve tanë, prindërve, nxënësve të atyre viteve, të vuajtjes, dhimbjes, sakrificës, por edhe nderit, krenarisë, viteve ekzistenciale dhe historike, të arsimit shqip, në veçanti, e popullit tonë, në përgjithësi.

Qysh në vitin 1990, mësimdhënësit dhe veprimtarët tjerë të arsimit, organeve të instaluara të Serbisë në Kosovë me gojë dhe me shkrim u thanë: “Jo, nuk do të punojmë me ligje dhe planprograme mësimore të shtetit serb, por do të punojmë me ligje dhe planprograme mësimore të Republikës së Kosovës”.

Dhe, për ta thyer këtë vendosmëri, policia dhe shërbimi sekret serb mori me orë dhe me ditë tëra në të ashtuquajtura biseda informative mbi 90% të mësimdhënësve, burgosi dhe rrahu shumë prej tyre, të cilët sot e atë ditë kanë probleme shëndetësore. Nxjerrja e mësueseve me dhunë nga ora mësimore dhe dërgimi i tyre në stacionet policore nën përcjellje të personave të armatosur dhe kërcënimin fizik të tyre, megjithatë ata nuk u dorëzuan dhe nuk nënshkruan deklarata të tilla nënshtruese.

Gjatë aksioneve famëkeqe policore pati edhe vrasje, siç ishte rasti i drejtorit të shkollës fillore “Bajram Curri” në Strelc, Haki Povataj, që vdiq nga dhuna policore e ushtruar ndaj tij, në stacionin e policisë në Deçan, më 21 korrik 1992, dhe i njëjti nuk pranoi të deklarojë se i pranon planprogramet e Serbisë. Policia, përveç mësimdhënësve, rrihte, burgoste, por edhe vriste edhe nxënës dhe studentë dhe prind ,siç ishte vrasja e tre prindërve në Uçë të Istogut, më 31 janar 1992.

Pushteti serb, duke vërejtur se dhuna dënimet me para, burgje rrahja dhe vrasjet nuk po jepnin rezultate për jetësimin e legjislacionit asimilues serb në shkollat shqipe, vendosi masat e dhunshme në shkolla, duke emëruar drejtor serbë në shkollat shqipe.

Pa dyshim që presidenti i Kosovës, dr. Ibrahim Rugova dhe LDK-ja ishin bartësit e këtij organizimi të shkëlqyeshëm, me një armatë të tërë njerëzish. Organizimi dhe puna institucionale e shkollave shqipe është bërë në harmoni me Deklaratën Kushtetuese, përkatësisht Kushtetutën e Republikës së Kosovës të 7 shtatorit 1990.

Planprogramet dhe tekstet mësimore për lëndët gjuhësore, shoqërore dhe humanitare, për disa shkallë të arsimit edhe nga matematika që nga viti shkollor 1994/95 ishin të përbashkëta me Republikën e Shqipërisë.

Mësimdhënësit rreth dy vjet punuan pa paga, kurse nga 1 prilli 1992 morën pagë nga 20 DM në atë kohë në muaj, e cila pagë në vitin 1998 arriti shumën 150 DM, por për çudi sot nuk u pranohet stazhi i punës i asaj kohe, krahasuar me atë të para viteve të '90-ta. Kështu, me rastin e pensionimit, stazhi po u pranohet vetëm atyre që kanë punuar së paku 15 vjet në organizatat e

ish-Jugosllavisë ose Serbisë, prandaj me rastin e pensionimit shumica e mësimeve të marrin vetëm pensionin e pleqërisë nga 50 euro në muaj, në vend që ta marrin pensionin të cilin e meritojnë.

Deputeti Ismet Beqiri më pas foli edhe rreth jehonës që ka pasur kudo në botën demokratike çështja e organizimit të arsimit në gjuhën shqipe në atë periudhë kohore.

Veprimtaria e arsimit krijoi edhe terren të volitshëm për krijimin dhe veprimin e UÇK-së, në radhët e së cilës u rreshtuan shumë nxënës, studentë, mësimeve, prej të cilëve me qindra ranë edhe në fushat e betejave.

Në fund, ai e paraqiti para Kuvendit tekstin e rekomandimeve dhe i ftoi deputetët t'i votojnë ato.

Idriz Vehapi, në emër të Komisionit për Arsim, Kulturë, Rini, Sport, Administratë Publike, Qeverisje Lokale dhe Media, tha se Komisioni e ka shqyrtuar çështjen në fjalë dhe Kuvendit ia ka rekomanduar që personelit të punësuar në arsimin shkollor 1990/91 deri në vitin shkollor 1998/99 t'i njihet përvoja e punës.

Arsim Bajrami, në emër të Grupit Parlamentar të PDK-së, tha se periudha '90, '98 e '99 është një periudhë kur populli u homogjenizua nëpërmjet shkollës, nëpërmjet arsimit dhe arsimit e tregoi vitalitetin e mbijetesës në kushte kur popullit të Kosovës i kanosej një shfarosje dhe kurdo që të shkruhet në mënyrë neutrale historia e re e Kosovës nga historianët realë, kjo periudhë është një periudhë shumë e ndritur, një periudhë ku shkolla e mbijetoi dhunën dhe kur populli u homogjenizua në idenë e Republikës së Kosovës, në idenë e një shteti të ardhshëm, i cili po lindte.

Ai në vazhdim i vlerësoi lart përpjekjet titanike që ka bërë ish-rektori i UP-së Ejup Statovci, duke e zbatuar idenë e Republikës së Kosovës nëpërmjet legjislacionit të Republikës së Kosovës, si shembulli më i mirë i sakrificës dhe intelektualit për kauzën kombëtare.

Më pas, ai tha se rekomandimet që i ka propozuar Grupi i LDK-së do të përkrahen pa kurrfarë dileme, por ai theksoi se do t'i shtojë edhe një rekomandim.

Vjollca Krasniqi, në emër të Grupit Parlamentar të LDK-së, tha se pas ndryshimeve kushtetuese të vitit 1989, Serbia me forma të ndryshme juridike policore filloi ta rrënojë totalisht sistemin arsimor në të gjitha nivelet, prej atij parashkollor deri te ai universitar.

Po atë vit, administrata shtetërore e Serbisë i hoqi drejtorët shqiptarë nëpër shkolla dhe i zëvendësoi ata me të dhunshmit. Futi masat e dhunshme në institucionet edukativo-arsimore dhe filloi dëbimin e nxënësve nga objektet shkollore.

Krahas kësaj, filloi vrasja, burgosja, ndjekjet penale, arrestimet, kërcënimet dhe presionet më të rënda, si dhe ndërprerja e financimit në të gjitha nivelet.

Duke u gjendur para një sfide të tillë, të rëndë, faktori politik i asaj kohe, i përkrahur nga populli i Kosovës brenda dhe jashtë filloi mobilizimin për t'u organizuar për ndërtimin e një sistemi të pavarur të arsimit, që do të thotë organizimin e vetëfinancimit. Financimi bëhej nga puna vullnetare dhe ndihmat që jepnin Diaspora dhe popullata shqiptare, të cilat këtë sistem e shihnin si hapin e parë të shtetësisë së Kosovës. Filloi ndryshimi i plan-programeve, botimi i teksteve mësimore, organizimi i mësimin në shtëpi-shkolla dhe masat tjera.

Sakrificën që e kanë bërë punëtorët e arsimit nuk e ka bërë askush në Kosovë, përveç luftëtarëve, që falë gjakut të tyre ne jemi të lirë. Punëtorët e arsimit i vunë themelet e para të shtetësisë së Kosovës dhe ajo periudhë u ujit me lot e gjak, ashtu siç do të thoshte shkrimtari Artur Graf - ‘arsimi është një bimë kryeneqe, e cila nuk gjelbëron e as lidh kokërr, në qoftë se nuk ujitet me lot e gjak’.

Në vend se sot ne të debatojmë në këtë seancë, ta kemi një seancë solemne dhe të jemi mirënjohës për ata punëtorë që kanë dhënë gjithë këtë kontribut për një dekadë, ne sot debatojmë që t’u njihet përvoja e punës punëtorëve të arsimit gjatë viteve në fjalë.

Ajo më pas e lexoi një vendim të Qeverisë që është nxjerrë në vitin 2008, në të cilin thuhet: “Miratohet iniciativa që t’u njihet stazhi i punës të gjithë mësimdhënësve, stafit administrativ dhe teknik në institucionet arsimore, të cilët kanë punuar në periudhën që nga 1990 deri në 1999. Ministria e Arsimit, Shkencës dhe Teknologjisë obligohet t’i fillojë përgatitjet ligjore dhe ta hartojë një raport detaj lidhur me numrin e mësimdhënësve që kanë punuar në këtë kohë në institucionet shkollore të Kosovës. Për zbatimin e këtij vendimi obligohet Ministria e Arsimit, Shkencës dhe Teknologjisë”.

Afrim Kasolli, në emër të Grupit Parlamentar të Lëvizjes “Vetëvendosje”, tha se ky diskutim për organizimin e shkollës shqipe gjatë viteve të ‘90-ta, si dhe për njohjen e përvojës së punës së mësimdhënësve shqiptarë gjatë asaj kohe përbën njërën nga çështjet me kyçe të historisë sonë të re. Është e ditur se tani, edhe 14 vjet pas luftës, mësimdhënësit e pensionuar e marrin vetëm pensionin bazë ose ndihmë sociale nga institucionet, e nuk u llogariten si vite pune ato vite të vështira, kur nën shtypjen më të egër mbërritën ta mbajnë gjallë arsimin shqip. Pajtohem se edhe pse ekziston një vendim i Qeverisë së Kosovës për njohjen e këtyre viteve si stazh pune, vendimi 2/20 i majit të vitit 2008 nuk po gjen ende zbatim. Pra, ashtu si shumë vendime të kësaj Qeverie, që lidhen me këtë sferë, edhe ky vendim ka mbetur vetëm në vazhden e deklaratave mediale e për konsum historik.

Ndërkaq është e ditur, në anën tjetër draft-ligji për pensionet nuk e specifikon njohjen e viteve të punës gjatë ‘90-‘99. Neni 8, pika 1.2 thotë se të drejtën në pension kontribut-pagues të moshës e realizojnë të gjithë personat që kanë së paku 15 vjet stazh pensional para datës 1.1.1999, prej të cilave 7 vjet e 7 muaj duhet të kenë stazh pune në Kosovë, por këtu nuk thuhet që hyjnë edhe vitet e punës në vitet e ‘90-ta. Pos tjerash, në bazë të këtij përkufizimi, të drejtë pensioni do të mund të kenë njësoj edhe policët serbë që kanë rrahur në atë kohë.

Ai më pas foli rreth skemës pensionale në Kosovë.

Lëvizja “Vetëvendosje” e përkrah këtë debat dhe pa dyshim do t’i votojë rekomandimet e parashtruara në tekstin e kërkesës për debat. Sepse, në këtë mënyrë ne e njohim karakterin legal të institucioneve tona dhe e denoncojmë karakterin ilegal të shtetit të Serbisë.

Teuta Haxhiu, në emër të Grupit Parlamentar të AAK-së, tha se edhe pse po bëhen plot 14 vjet që nga përfundimi i luftës në Kosovë dhe 5 vjet nga shpallja e pavarësisë, kërkesat e arsimtarëve shqiptarë të Republikës së Kosovës, të cilët punuan që nga viti shkollor 1990 e deri në vitin shkollor ‘98/‘99 për zgjidhjen e stazhit të punës që e realizuan këtë sistem arsimor dhe barazimi i statusit të tyre me personat e merituar për rezistencë kundër pushtetit okupues të Serbisë, fatkeqësisht edhe sot e kësaj dite po mbetet në vesh të shurdhër dhe si i tillë i pazgjidhur.

Punëtorët e arsimit shqiptar të këtyre viteve ishin ndër hallkat e para jashtëzakonisht të rëndësishme të rezistencës gjithëpopullore dhe bartës të fillimit të krijimit dhe veprimit institucional, para së gjithash ndaj represionit, dhunës dhe okupimit të Kosovës në atë kohë.

Përkundër rrethanave shumë të vështira, falë vullnetit të jashtëzakonshëm të këtyre arsimtarëve, edhe cilësia arsimore ishte në nivelin e duhur, sepse bartësit e arsimit shqip në Kosovë ishim shumë të vetëdijshëm se vetëm të ditur e të shkolluar bashkërisht mund ta sfidonim regjimin e egër të pushtuesit dhe të marshojmë kah e ardhmja me vizion të qartë.

Ajo më pas e shtroi çështjen se si është e mundur që e gjithë kjo sakrificë e mësimdhënësve shqiptarë të neglizhohet në këtë masë, për të mos thënë po injorohet skajshmërisht. Si është e mundur që të tjerët që punuan në organet apo institucionet e Serbisë së paku 15 vjet u pranohet përvoja e punës, ndërsa arsimtarëve shqiptarë - kësaj pjese më të nderuar të shoqërisë sonë dhe sot, nuk u pranohet për 10 vjet asgjë. Kjo është e papranueshme dhe ky fakt duhet të trokasë në ndërgjegjen e secilit prej nesh.

Ne si Aleancë vazhdimisht e kemi përkrahur dhe do t'i mbështetim punëtorët e arsimit të këtyre viteve dhe konsiderojmë se është momenti i fundit që kjo Qeveri ta bëjë gjënë e duhur dhe të ndërmarrë hapa konkretë drejt zgjidhjes së kësaj çështjeje jetike për të gjithë ata mësimdhënës.

Aleanca për Ardhmërinë e Kosovës i përkrah rekomandimet e paraqitura dhe kjo është, para së gjithash, ajo që më së paku mund të bëjmë për ta.

Myzejene Selmani, në emër të Grupit Parlamentar të KKR-së, tha se të gjithë qytetarët e Kosovës që nga vitet e mëhershme se '90, '91 e deri në përfundimin e luftës janë ata të cilët i kanë bërë rezistencë pushtuesit serb, mirëpo nëse flasim për sektorin e arsimit në këtë periudhë, atëherë mund të themi se këtu ka filluar rezistenca më e mirë, për arsye të shkollimit të gjeneratave të ardhshme, të cilat janë zhvilluar në atë situatë.

Koalicioni për Kosovë të Re i përkrah rekomandimet e Grupit Parlamentar të LDK-së dhe Komisionit Parlamentar, mirëpo kërkojmë që jo vetëm arsimtarët, nxënësit dhe profesorët, por edhe qytetarët e Diasporës ta marrin një lëvdatë për punën të cilën e kanë bërë me financimin e fondit për këta arsimtarë.

Për këtë pikë të rendit të ditës diskutuan edhe deputetët: **Suzan Novobërdaliu, në emër të Komisionit për të Drejtat e Njeriut, Barazi Gjinore, Persona të Pagjetur dhe Peticione; Idriz Vehapi, Afërdita Berisha-Shaqiri, Albana Gashi, Rita Hajzeraj-Beqaj, kryeministri Hashim Thaçi, Ismet Beqiri, Naser Osmani, Lumnije Morina, Albulena Haxhiu, Kimete Bajraktari, Emin Gërbeshi, Bahri Thaçi, Salihe Mustafa, Time Kadrijaj, Haki Demolli, Sabri Hamiti, Ramiz Lladrovci, ministri Ramë Buja, ministri Nenad Rashiq, Jakup Krasniqi, Xhevdet Neziraj, Salih Morina, Halit Krasniqi, Arben Gashi, Ardian Gjini, Ganimete Musliu, Kimete Bytyçi, Valbona Dibra, Nazane Breca, Xhevahire Izmaqi, Vjosa Osmani, Sala Berisha-Shala, Imri Ahmeti, Eqrem Kryeziu, Hykmete Bajrami dhe Adem Grabovci**, diskutimet e të cilëve janë dhënë të plota në transkript.

Deputeti Ismet Beqiri, në emër të propozuesit të çështjes, në fund të debatit e paraqiti tekstin e rekomandimeve për miratim nga Kuvendi.

Kryesuesi, në mungesë të kuorumit për të proceduar me votimin e rekomandimeve të paraqitura, i mbylli punimet e mbledhjes së sotme në orën 18:10 minuta.

E enjte, më 18 prill 2013

Vazhdimi i mbledhjes plenare, të filluar më 11 prill 2013

Kryetari konstatoi se në sallë janë të pranishëm 77 deputetë dhe procedoi me pikën e mbetur të rendit të ditës:

1. Votimi i rekomandimeve nga debati parlamentar lidhur me statusin e pazgjidhur të punëtorëve të arsimit shqiptar të Republikës së Kosovës nga viti shkollor 1990 deri në vitin 1999, sipas kërkesës së Grupit Parlamentar të Lidhjes Demokratike të Kosovës dhe rekomandimeve të komisioneve parlamentare

Kryetari i njoftoi deputetët se diskutimet për këtë pikë të rendit të ditës kanë përfunduar në mbledhjen plenare të mbajtur më 11 prill 2013. Mirëpo, në mungesë të kuorumit nuk ishte proceduar me votim.

Kryetari i hodhi në votim rekomandimet e paraqitura nga Grupi Parlamentar i Lidhjes Demokratike të Kosovës dhe të komisioneve parlamentare.

Rezultati i votimit ishte, si vijon:

Për ----- 66

Kundër ----- 7

Abstenime -----1

Kryetari konstatoi se Kuvendi, me shumicë votash, i nxori këto:

REKOMANDIME

1. Të nxirret ligj i veçantë për statusin e punëtorëve të arsimit shqiptar të Republikës së Kosovës nga viti shkollor '90/'91 deri në vitin shkollor '98/'99, në bazë të cilit ligj statusi i tyre barazohet me statusin e personave të merituar në formimin dhe ndërtimin e shtetit të Republikës së Kosovës.
2. Ky ligj të përfshijë, mes tjerash, rregullimin e statusit të mësimdhënësve, personelit udhëheqës, personelit tjetër të punësuar në shkolla, përkatësisht universitete, të punësuarve në sekretariatet, këshillat komunale të arsimit, entet pedagogjike komunale dhe republikane si dhe në Ministrinë e Arsimit të Republikës së Kosovës, të punësuarve në këshillat e financimit, të pronarëve shtëpi-shkolla dhe
3. Qeveria e Republikës së Kosovës ta hartojë këtë ligj në afatin kohor prej 3 muajsh dhe ta procedojë për miratim në Kuvendin e Republikës së Kosovës.

Kryetari i mbylli punimet e mbledhjes plenare në orën 10:25 minuta.

Kryetari i Kuvendit

Jakup KRASNIQI

Procesverbalin e hartoi:

Drejtoria për Çështje Plenare dhe Procedurale